



# Propostas de acción da CTNL

## para o período interasemblar 2021-2022

(para o seu debate na Asemblea Xeral ordinaria do 6 de marzo de 2021)

### Accións para o cumprimento dos fins da asociación

---

#### 1 Defender os intereses xerais das/dos traballadoras/es de normalización lingüística e da dignidade das condicións de traballo dos servizos lingüísticos:

- Realizar propostas que busquen **mellorar a situación do traballo en normalización lingüística**, nomeadamente na procura da estabilización dos servizos de normalización lingüística e demais departamentos técnicos existentes, propor a creación e a mellora de axudas para o mantemento, a creación e o reforzo de servizos de normalización lingüística nas administracións locais e facer un seguimento das convocatorias xa publicadas.
- Continuar a **difundir o traballo que se desenvolve a prol do galego**, procurando así que o labor a favor da lingua se vexa socialmente como útil e necesario. Para isto continuarase a difusión e información a través do web e redes sociais do traballo de SNL, ENDL, asociacións, empresas, etc., publicando novas, reportaxes, entrevistas, etc. Tentarase divulgar especialmente o **labor de planificación lingüística** co fin de que se coñezan mellor as diferentes etapas do traballo técnico de normalización da lingua e de que se recoñeza a complexidade e a necesidade deste traballo. En relación con esta tarefa naceron en 2019 os Premios Mil Primaveras, que teñen entre os seus obxectivos a difusión do traballo de normalización da lingua.
- Como complemento do [Manual de procesos selectivos para técnicos/as de normalización lingüística](#), publicado en xaneiro de 2021, finalizar unha **proposta de temario específico para prazas de técnico/a de normalización lingüística** que inclúa ademais **exemplos de probas, especialmente das**



**probas prácticas**, adaptado todo á realidade do traballo de normalización da lingua. Buscarase despois que institucións que teñen capacidade para influír nas entidades que convocan as prazas recoñezan e asuman a proposta.

Con esta proposta búscase máis unificación nos procesos selectivos, evitar convocatorias pouco adaptadas á realidade do traballo de normalización da lingua e facilitar tanto a preparación das probas por parte dos/das candidatos/as coma o traballo dos membros dos tribunais de selección.

- Redactar unha **proposta unificada de como deben ser as probas de lingua galega para o acceso a prazas nas administracións públicas** (prazas diferentes a técnicos/as de normalización lingüística), a partir do traballado no [Curso sobre avaliación de competencias lingüísticas para técnicos/as de normalización lingüística](#), [cuxo material xa está publicado no web](#).

A proposta debería despois presentarse á Secretaría Xeral de Política Lingüística, á Dirección Xeral de Administración Local, á Fegamp..., é dicir, ás institucións que poidan asumila e recomendala como orientación para desenvolver este tipo de probas de capacitación lingüística.

## **2 Promover a formación continua no eido da normalización da lingua:**

### **ORGANIZACIÓN DE ACCIÓNS FORMATIVAS PARA O TRABALLO EN NORMALIZACIÓN LINGÜÍSTICA**

Cada ano a CTNL procura organizar algunha actividade formativa sobre diversas materias na procura de mellorar os coñecementos e as capacidades das persoas que traballan en normalización lingüística en diferentes ámbitos. Neste 2021 propomos o desenvolvemento dalgún curso ou obradoiro con algún dos seguintes contidos:

<b>Ferramentas da educación social ao servizo da normalización da lingua</b>	
<b>Obxectivo xeral</b>	<ul style="list-style-type: none"> <li>• Coñecer as bases teóricas e as metodoloxías de intervención vinculadas á educación social para empregalas no proceso de normalización lingüística.</li> </ul>
<b>Obxectivos específicos</b>	<ul style="list-style-type: none"> <li>• Achegar unha visión panorámica e resumida das teorías en que se basea a intervención desde o ámbito da educación social, de maneira que sexa útil para o traballo técnico de normalización da lingua.</li> <li>• Fornecer unha bibliografía básica recomendable.</li> <li>• Abordar de xeito teórico e práctico contidos de comunicación, habilidades sociais, liderado, manexo de grupos e resolución de conflitos.</li> <li>• Expoñer de xeito práctico diferentes modelos de intervención e o seu posible rendemento para o traballo dos servizos de normalización da lingua.</li> <li>• Practicar, arredor de supostos concretos, as diferentes técnicas e habilidades que, desde a educación social, resultan útiles para a intervención sociolingüística.</li> <li>• Analizar algunhas intervencións realizadas para extraer conclusións a respecto das boas prácticas que mellorarían a súa eficacia.</li> </ul>
<b>Destinatarios/as</b>	<ul style="list-style-type: none"> <li>• Traballadores/as de servizos de normalización lingüística (SNL).</li> <li>• Traballadores/as de empresas, asociacións e outras entidades relacionadas coa normalización da lingua.</li> <li>• Membros de equipos de normalización e dinamización da lingua do ensino.</li> <li>• Persoas interesadas en traballar pola normalización da lingua.</li> </ul>
<b>Duración</b>	Entre 12 e 20 horas
<b>Profesorado</b>	Educador/a social con experiencia neste tipo de formacións



<b>Obradoiro de planificación e avaliación a partir da educación social</b>	
<b>Obxectivo xeral</b>	<ul style="list-style-type: none"><li>• Coñecer as bases teóricas e as metodoloxías da educación social para empregalas na planificación e na avaliación das accións de normalización lingüística.</li></ul>
<b>Obxectivos específicos</b>	<ul style="list-style-type: none"><li>• Achegar unha visión panorámica dos procesos de planificación e avaliación de accións.</li><li>• Fornecer unha bibliografía básica recomendable.</li><li>• Abordar de xeito teórico e práctico a detección de necesidades, o proceso de planificación e a súa metodoloxía, as fases e niveis de planificación, os recursos, os/as destinatarios/as, a temporalización etc.</li><li>• Expoñer de xeito práctico diferentes modelos de planificación e avaliación e o seu posible rendemento para o traballo dos servizos de normalización da lingua.</li></ul>
<b>Destinatarios/as</b>	<ul style="list-style-type: none"><li>• Traballadores/as de servizos de normalización lingüística (SNL).</li><li>• Traballadores/as de empresas, asociacións e outras entidades relacionadas coa normalización da lingua.</li><li>• Membros de equipos de normalización e dinamización da lingua do ensino.</li><li>• Persoas interesadas en traballar pola normalización da lingua.</li></ul>
<b>Duración</b>	Entre 5 e 10 horas
<b>Profesorado</b>	Educador/a social con experiencia neste tipo de formacións

<b>Obradoiro de comunicación de argumentos no ámbito empresarial</b>	
<b>Obxectivos</b>	<ul style="list-style-type: none"> <li>• Analizar diferentes argumentos para asociar a lingua con intereses e vantaxes no ámbito comercial e empresarial</li> <li>• Coñecer as estratexias de comunicación máis valoradas no ámbito empresarial</li> <li>• Elaborar un argumentario que axude a introducir a lingua a canda outras vantaxes de comunicación no ámbito comercial e empresarial</li> <li>• Desenvolver estratexias de comunicación orientadas ao sector comercial e empresarial</li> </ul>
<b>Destinatarios/as</b>	<ul style="list-style-type: none"> <li>• Traballadores/as de servizos de normalización lingüística (SNL).</li> <li>• Traballadores/as de empresas, asociacións e outras entidades relacionadas coa normalización da lingua.</li> <li>• Persoas interesadas en traballar pola normalización da lingua.</li> </ul>
<b>Duración</b>	Aproximadamente 10-12 horas
<b>Profesorado</b>	Persoa con perfil adecuado para desenvolver o obradoiro.

## **DOCUMENTOS FORMATIVOS E INFORMATIVOS**

- Publicación dunha proposta de temario para prazas de TNL
- Publicación dunha proposta sobre as probas para acreditar o coñecemento de lingua no acceso a prazas nas administracións públicas
- Publicación e difusión a través da rede de materiais formativos de cursos da CTNL.

### 3 Propostas para facer máis efectivo o traballo a prol da normalización da lingua e colaboración en accións para o fomento do galego:

#### ACCIÓNS PARA UNHA MELLOR E MAIOR IMPLICACIÓN DAS ADMINISTRACIÓNS PÚBLICAS NO PROCESO DE NORMALIZACIÓN LINGÜÍSTICA

- **XUNTA DE GALICIA:** facer un seguimento da política lingüística da Xunta de Galicia, instándoa a que procure avances en vez de retrocesos, denunciando os pasos atrás que se dean e os pasos adiante que se deixen de dar e propondo melloras no desenvolvemento de proxectos e accións para o fomento do uso e prestixio da lingua galega.
- **ADMINISTRACIÓN LOCAL:** facer un seguimento das convocatorias de axudas das deputacións provinciais para a creación de SNL e tamén das convocatorias de prazas en concellos e entidades locais ao abeiro ou non destas axudas; manter xuntanzas cos responsables das áreas de normalización lingüística das deputacións provinciais para que promovan a creación e consolidación dunha rede de SNL nas entidades locais da provincia.

#### ENCUNTROS, XORNADAS E OUTRAS PROPOSTAS DE COORDINACIÓN

##### **LGx15 (<https://lgx15.gal/>)**

<b>Descrición xeral</b>	<p>Gravación dun conxunto de vídeos que teñan que ver co futuro da lingua, nos cales interveñan persoas que transmitan, dun xeito breve e visual, ideas que poden influír no futuro do uso e do prestixio do galego e/ou nas actitudes e comportamentos lingüísticos de persoas ou entidades, procurando accións e cambios.</p> <p>Esas intervencións, ideas e propostas poderán formar parte dun evento con público, como nas edicións de 2015 a 2019, se as condicións sanitarias o permiten; ou simplemente seren gravadas en privado para a súa difusión a través das redes sociais, como na</p>
-------------------------	--

	edición de 2020.
<b>Obxectivos</b>	<ul style="list-style-type: none"> <li>• Recoller e difundir ideas coas cales se pode mellorar o futuro do uso e prestixio da lingua.</li> <li>• Realizar e difundir vídeos breves para a transmisión desas ideas.</li> <li>• Procurar influír no futuro do uso e prestixio do galego e/ou nas actitudes e comportamentos lingüísticos de persoas ou entidades, procurando accións e cambios, a través da transmisión de ideas e mensaxes de persoas.</li> </ul>
<b>Destinatarios/as</b>	<ul style="list-style-type: none"> <li>• Persoas interesadas no futuro da lingua (na sesión presencial) e, ademais, tamén público máis xeral (coa difusión dos vídeos).</li> </ul>
<b>Duración</b>	Unha tarde ou tarde-noite (arredor de 3 ou 4 horas) se é un evento público; un día completo se se trata de gravacións sen evento.
<b>Formato</b>	Intervencións individuais cun tempo máximo (15 min.), claras e visuais, sen preguntas, e sen uso de mesa nin atril.
<b>Lugar</b>	Nun auditorio por determinar.
<b>Persoas que interveñen</b>	Persoas que teñan algo que dicir, ideas que valla a pena compartir e transmitir para influír no futuro da lingua, e que teñan capacidade para comunicar de xeito claro, positivo, apaixonado, visual e breve, coa vontade de intentar mudar cousas. A busca ou selección de persoas e propostas faraa a CTNL.
<b>Notas sobre a xestión</b>	Desde a CTNL nomearase unha comisión encargada da organización, selección de persoas, xestión etc. Non se pagará polas intervencións.

- **ENCUNTROS PARA A NORMALIZACIÓN LINGÜÍSTICA:** colaboración cos XXIII Encontros para a normalización lingüística, organizados desde o CDSG do Consello da Cultura Galega (en outubro-novembro de 2021).

## ACCIÓNS DE FOMENTO DO GALEGO

- **Resolución da segunda edición dos Premios Mil Primaveras a proxectos de posta en valor e fomento do galego (<https://milprimaveras.gal/>) e convocatoria dunha terceira edición**

Tras a primeira convocatoria destes premios en 2019 (convocatoria en abril, resolución dos premios en xuño e acto de entrega en setembro), continuouse coa segunda en 2020, aínda que se tivo que adiar o prazo de inscrición para o final do ano. O prazo de inscrición acabou o 31 de xaneiro de 2021 e neste momento o xurado está a valorar os proxectos. Esperamos ter a resolución antes da Semana Santa e a entrega de premios, se é posible realizar algún tipo de acto, antes do verán. Para o acto de entrega xa non contamos con axuda económica da Deputación Provincial de Pontevedra, pois a anterior subvención pechouse en decembro de 2020; daquela, procuraremos aproveitar outras fontes de financiamento coma o programa PonteGal (<https://www.depo.gal/pontegal>).

A convocatoria dunha nova edición dos premios terá que realizarse na segunda metade do ano e probablemente continuar con este formato a cabalo entre dous anos en edicións posteriores. Solicitarase de novo axuda á Deputación Provincial de Pontevedra a través da súa liña de subvencións a asociacións para desenvolver accións de normalización lingüística.

- **Continuidade e difusión de Agasallo.eu, propostas de regalos en galego (<https://www.agasallo.eu>)**

A finais de 2013 púxose en marcha a plataforma dixital Agasallo.eu, para compilar e difundir propostas de regalos en galego de todo tipo, para todos os gustos e idades, co fin de dar a coñecer e difundir creacións que usan a lingua galega e incentivar que a xente teña en conta a lingua á hora de agasallar. Na actualidade a plataforma contén máis de 1000 propostas de regalos que corresponden a aproximadamente 130 empresas.

A xestión deste web lévase en exclusiva desde a directiva da CTNL, é bastante traballosa e require un esforzo de actualización que é difícil manter ao día. Propomos





estudar durante este ano 2021 a modificación do proxecto para convertelo dun catálogo de produtos a un **catálogo de empresas que teñen produtos de agasallo en galego**. Así evitaríase ter que subir os produtos copiando dos webs das empresas e estarmos pendentes de actualizar cales seguen en venda e cales non; serán as empresas as encargadas de manter actualizados os seus webs e produtos.

Por outra parte, o cambio permitiríanos ter máis tempo para **reforzar as redes sociais do proxecto**, e mesmo incluír algunha nova rede como Instagram. Ademais, empregando un sistema claro e homoxéneo de etiquetas podemos usar as redes sociais como buscador de produtos, e así non perdermos esa funcionalidade do web. Na actualidade o proxecto ten actividade grazas ás redes sociais; é nelas onde as persoas usuarias descubren os novos produtos e en xeral o proxecto. O sitio web só é consultado como ponte para ir aos webs das empresas que elaboran os produtos, sobre todo se son de venda en liña. Procurarase manter o web antigo durante un tempo (sen actualizar) para non paralizar o proxecto, ata que a nova versión estea a pleno funcionamento.

Continuarase cos sorteos do material que hai en stock e de novo material que se poida solicitar ás empresas participantes.

## **A CTNL FAI 25 ANOS**

A CTNL creouse en 1996 e por tanto **neste 2021 facemos 25 anos**; chegamos a un aniversario importante grazas ao traballo e ao apoio das socias e dos socios. Para conmemorar esta traxectoria, propomos elaborar **unha peza audiovisual, que se poida difundir tanto completa coma en extractos breves**, con varios obxectivos:

- Dar a coñecer mellor a asociación e o seu papel no traballo de normalización da lingua.
- Difundir e valorizar o labor de normalización da lingua a través da experiencia das persoas que traballan neste ámbito.

Para a realización desta peza necesitamos a axuda das socias e dos socios, que sodes as persoas que mellor podedes contar que é para vós a CTNL, en que vos axudou a mellorar no traballo, que esperades da asociación no futuro, cales son os



puntos fortes e febles do voso labor, que aspectos do traballo son máis enriquecedores ou ilusionantes etc. Trátase de facer unha recolla de experiencias que axude a presentar o labor de normalización lingüística desde as persoas que o desenvolvedes día a día.

## Algunhas propostas organizativas para 2021-2022

---

- Mantemento da cota dos/as socios/as como nos últimos anos, sen ningún incremento (a cota convencional é de 25 € ao ano e a de desempregados/as e estudantes de 15 € ao ano).
- Contratación dun **seguro de responsabilidade civil**.
- Posta en marcha de **grupos de traballo** para o desenvolvemento dos diversos proxectos programados.
- Procura de renovación de convenios e novos acordos de colaboración con outras entidades para o desenvolvemento dalgunhas das accións.
- Nas comisións e plataformas das que a CTNL forma parte seguiranse facendo propostas en positivo e procurando que sexan o máis plurais e representativas posible, e que a través delas se dea voz, participación e protagonismo a persoas e entidades varias e de distinto ámbito e perfil a prol da normalización lingüística. Nestes momentos a CTNL forma parte de:
  - Comisións Técnica do Centro de Documentación Sociolingüística de Galicia (CDSG).
  - Consello Municipal da Lingua do Concello de Vigo (froito da fusión entre o Consello Social da Lingua e a Comisión Cidadá de Normalización Lingüística, da cal formaba parte a CTNL)
  - Plataforma Queremos Galego.

Anxos Sobriño Pérez, presidenta da CTNL

Pontevedra, 17 de febreiro de 2021